

propinquorum cædem, RÁMÆ pedem decem capitibus suis impositum putabat.

53. Per *Rákshasum*, capreæ forma indutum, RAGHUIDAS decipiens, per aliquod tempus avium principis contentionibus impeditus, SÍTAM abripuit.

54. Ambo fratres, SÍTAM quærentes, vulturem conspexerunt, alis abscissis, qui spiritu per guttur exeunte sui in DASARATHAM amoris debitum solverat.

55. Hic SÍTAM a RÁVANA raptam esse, voce illis narravit, atque nobile suum ipsius factum vulneribus annuntians, mortuus est.

56. Ambo illi, quorum dolor de patris morte novus adhuc erat, in illo, haud aliter ac in patre suo, cærimonias funebres, inde a combustione, iterum exsequebantur.

57. Suadente KABANDHA, qui per mortem ab imprecatione liberabatur, RÁMAS amicitiam contraxit cum simio SUGRÍVA, qui in eadem ac ipse calamitate versabatur.

58. BÁLINE occiso heros ille in ejus locum diu expetitur substituit SUGRÍVAM, veluti radicem vicariam in primæ radicis locum.

59. Deinde simii, ad SÍTAM quærendam a marito missi, huc illuc vagantur, perinde ut RÁMÆ vota.

60. Nuntio de illa accepto e SAMPÁTIS ore, MARUTÆ filius oceanum trajecit, vitam mundanam veluti, sine sui commodi studio.

61. Ille investigans conspexit JANAKÆ filiam in urbe *Lanka*, *Rákshasorum* mulieribus cinctam, pudicam veluti Mimosam, herbis veneniferis circumdatam.

62. Dedit ei simius annulum, mariti signum, cui frigidæ illius gaudii lacrymæ obviam quasi veniebant.

63. Postquam nuntiis de marito SÍTAM exhilarasset, ille, AKSHÆ cæde elatus, urbem *Lankam* combussit, per breve tempus vexationem ab hoste sustinens.

64. Re peracta ostendit RÁMÆ signum mutuum, ipsum veluti SÍTÆ cor, corpore induto aggressum.